

2020-2021 年度
香港華仁書院 中國語文科
中二級 文言自習篇章

第一篇

《水經注·江水》 酈道元

江水又東，徑黃牛，山下有灘，名曰「黃牛灘」。南岸重嶺疊起，最外高崖間有石如人負刀牽牛，人黑牛黃，成就分明；既人跡所絕，莫得究焉。此岩既高，加以江湍紆回，雖途徑信宿，猶望見此物，故行者謠曰：「朝發黃牛，暮宿黃牛；三朝三暮，黃牛如故。」言水路紆深，回望如一矣。

第二篇

《岳陽紀行》 袁宗道

從石首至岳陽，水如明鏡，山似青螺，蓬窗下飽看不足。最奇者墨山僅三十里，舟行二日，凡二百餘里，猶盤旋山下。日朝出於斯，夜沒於斯，旭光落照，皆共一處。蓋江水縈回山中，故帆檣繞其腹背，雖行甚駛，只覺濡遲耳。

第三篇

《穿井得人》 呂氏春秋

宋之丁氏，家無井而出溉汲，常一人居外。及其家穿井，告人曰：「吾家穿井得一人。」有聞而傳之者曰：「丁氏穿井得一人。」國人道之，聞之於宋君。宋君令人問諸丁氏。丁氏對曰：「得一人之使，非得一人於井中也。」求聞之若此，不若無聞也。

第四篇

《夔有一足》 呂氏春秋

魯哀公問於孔子曰：「樂正夔一足，信乎？」孔子曰：「昔者舜欲以樂傳教於天下，乃令重黎舉夔於草莽之中而進之，舜以為樂正。夔於是正六律，和五聲，以通八風，而天下大服。重黎又欲益求人，舜曰：『夫樂，天地之精也，得失之節也，故惟聖人為能和。和，樂之本也。夔能和之，以平天下，若夔者一而足矣。』故曰『夔一足』，『非一足』也。」

第五篇

《小港渡者》 周容

庚寅冬，予自小港欲入蛟川城，命小奚以木簡束書從。時西日沉山，晚煙縈樹。望城二里許，因問渡者：「尚可得南門開否？」渡者熟視小奚，應曰：「徐行之，尚開也；速進，則闔。」予慍為戲，趨行。及半，小奚仆，束斷書崩，啼未即起，理書就束，而前門已牡下矣。予爽然，思渡者言近道。天下之以躁急自敗，窮暮而無所歸宿者，其猶是也夫！其猶是也夫！

第六篇

《高陽應造屋》 呂氏春秋

高陽應將為室家，匠對曰：「未可也，木尚生，加塗其上，必將撓。以生為室，今雖善，後將必敗。」高陽應曰：「緣子之言，則室不敗也——木益枯則勁，塗益幹則輕，以益勁任益輕，則不敗。」匠人無辭而對，受令而為之。室之始成也善，其後果敗。

第七篇

《錢若賡斷鵝》 褚人獲

明萬曆中，錢若賡守臨江，多異政。有鄉人持鵝入市，寄店中他往。還索鵝，店主賴之，云：「群鵝我鵝也。」鄉人訟於郡。公令人取店中鵝，計四隻，各以一紙，給筆硯，分四處，令其供狀。人莫不訝之。已退，食，使人問鵝供狀否？答曰：「未。」少頃出，下堂視之，曰：「狀已供矣。」因指一鵝曰：「此鄉人鵝。」蓋鄉人鵝，食野草，糞色青；店鵝食穀粟，糞色黃。店主伏罪。

第八篇

《孫亮辨奸》 陳壽

孫亮出西苑，方食生梅，使黃門至中藏取蜜漬梅，蜜中有鼠矢；召問藏吏，藏吏叩頭。亮問吏曰：「黃門從汝處求蜜邪？」吏曰：「向求，實不敢與。」黃門不服，侍中刁玄、張邠啟：「黃門、藏吏辭語不同，請付獄推盡。」亮曰：「此易知耳。」令破鼠矢，矢裡燥。亮大笑謂玄、邠曰：「若矢先在蜜中，中外當俱濕，今外濕裡燥，必是黃門所為！」黃門首服，左右莫不驚悚。